



Na osnovu članova 25. i 74. Statuta Općine Centar Sarajevo – prečišćen tekst („Službene novine Kantona Sarajevo“, broj 23/04), člana 14. i 20. Odluke o izvršavanju Budžeta Općine Centar Sarajevo za 2026. godinu („Službene novine Kantona Sarajevo“, broj: 52/25), člana 3. Pravilnika o uslovima, načinu i kriterijima za dodjelu sredstava vjerskim zajednicama broj 01-11-3207/26 od 28.04.2026.godine i Odluke o pokretanju postupka raspisivanja i provođenje Javnog poziva broj: 13-11-3634/26 od 02.06.2026. godine, Općinski načelnik upućuje

JAVNI POZIV za izbor korisnika i dodjele sredstava vjerskim zajednicama iz Budžeta Općine Centar Sarajevo za 2026. godinu.

I PREDMET JAVNOG POZIVA

Predmet javnog poziva je raspodjela finansijskih sredstva vjerskim zajednicama iz Budžeta Općine Centar Sarajevo planiranih u Budžetu Općine Centar za 2026. godinu na sljedećim pozicijama:

- 614319- Tekući transferi vjerskim zajednicama za programske aktivnosti i obilježavanje vjerskih praznika u iznosu od 20.000,00 KM i
- 615311-2 Kapitalni transferi neprofitnim organizacijama Vjerske institucije i zajednice u iznosu od 30.000,00 KM

Sredstva koja se dodjeljuju po ovom Javnom pozivu ne predstavljaju državnu pomoć u smislu Zakona o sistemu državne pomoći u BiH, odnosno ovim Javnim pozivom se neće finansirati aktivnosti privrednih subjekata koji obavljaju ekonomsku djelatnost na tržištu.

Ukoliko se utvrdi da sredstva predstavljaju državnu pomoć u smislu propisa o državnoj pomoći, ista će se dodijeliti u skladu sa relevantnim propisima, uključujući pravila o de minimis pomoći.

II PRAVO NA DODJELU SREDSTAVA I NAMJENA

Pravo na dodjelu sredstava imaju vjerske zajednice sa sjedištem na području Općine Centar ili imaju izgrađene vjerske objekte na području ove općine. Također, sredstva se mogu dodijeliti i vjerskim zajednicama koje nisu na području Općine Centar, ali su od značaja za redovno obavljanje vjerskih obreda za lokalno stanovništvo.

Sredstva po ovom Javnom pozivu će se dodjeljivati za:

- a)građevinsko – zanatske radove, sanaciju, ili rekonstrukciju postojećeg vjerskog objekta ili dijela objekta, kao i izgradnju – dogradnju novog objekta ili dijela objekta;
- b)organizaciju vjerskih praznika, blagdana, manifestacija, vjersko – kulturnih i prosvjetnih događaja, tribina, okruglih stolova, te raznih oblika i vidova prezentiranja stvaralaštva vjerske zajednice, kao i štamparsko – izdavačke, prevodilačke i druge aktivnosti.

Prednost za dodjelu sredstava kapitalnog granta imaju vjerski objekti sa područja općine Centar Sarajevo, te oronuli, dotrajali objekti koji imaju status kulturno-historijskog naslijeđa ili su pod zaštitom države, kao i objekti čije stanje ugrožava sigurnost imovine i lica.

U slučaju da po okončanju Javnog poziva ostanu neutrošena sredstva, ista će se preraspodijeliti drugim vjerskim zajednicama, u skladu sa pristiglim zahtjevima po redoslijedu podnošenja, a uz prethodno pribavljeno mišljenje Komisije za odnose sa vjerskim zajednicama.

III KRITERIJI I VISINA SREDSTAVA KOJU JEDAN KORISNIK MOŽE OSTVARITI

Sredstva planirana u Budžetu raspodjeljuju se vjerskim zajednicama za projektne i druge aktivnosti, i to:

- Institucijama IZ u BiH – Medžlis IZ Sarajevo i dr. – 50 % od ukupno planiranih budžetskih sredstava za vjerske zajednice.
- Institucijama Katoličke crkve u BiH – Vrhbosanska nadbiskupija i dr. – 25 % od ukupno planiranih budžetskih sredstava za vjerske zajednice.
- Institucijama SPC u BiH - Mitropolija Dabrobosanska i dr. – 15% od ukupno planiranih budžetskih sredstava za vjerske zajednice.
- Institucijama Jevrejske zajednice BiH – Jevrejska općina Sarajevo – 10% od ukupno planiranih budžetskih sredstava za vjerske zajednice.

Za poziciju: Tekući transferi vjerskim zajednicama za programske aktivnosti i obilježavanje vjerskih praznika, iznos sredstava koji se može dodijeliti jednom korisniku ne može biti manji od 1.000,00 KM niti veći od 10.000,00 KM, s tim da dodijeljeni iznos ne može prelaziti ukupno raspoloživa sredstva utvrđena za vjersku zajednicu kojoj korisnik pripada.

Za poziciju: Kapitalni transferi neprofitnim organizacijama Vjerske institucije i zajednice, iznos sredstava koji se može dodijeliti jednom korisniku ne može biti manji od 2.000 KM, niti veći od 15.000,00 KM, s tim da dodijeljeni iznos ne može prelaziti ukupno raspoloživa sredstva utvrđena za vjersku zajednicu kojoj korisnik pripada.

(Eliminatorni kriteriji)

Služba neće razmatrati zahtjeve za dodjelu novčanih sredstava onim vjerskim zajednicama koje nisu u skladu sa Odlukom o izvršenju budžeta Općine Centar Sarajevo dostavile izvještaj o utrošku novčanih sredstava za prethodne godine.

Služba neće razmatrati zahtjeve pojedinačnih vjerskih objekata za dodjelu novčanih sredstava iz kapitalnog i tekućeg granta, koji nemaju status pravne osobe u skladu sa Zakonom o slobodi vjere i pravnom položaju crkava i vjerskih zajednica u BiH („Službeni glasnik BiH“, broj 5/04).

Služba neće razmatrati zahtjeve čija vrijednost prelazi iznos ukupno planiranih sredstava u Budžetu za ove namjene bez dokaza o obezbjeđenju dodatnih sredstava od strane drugih donatora.

IV POTREBNA DOKUMENTACIJA

Podnosioci zahtjeva na Javni poziv trebaju dostaviti sljedeće:

a) Zahtjev za dodjelu sredstava:

- za dodjelu novčanih sredstava iz kapitalnog granta zahtjev treba biti detaljno obrazložen, sa preciznim informacijama o projektu, sa predmjerom i predračunom radova, planiranim aktivnostima, namjeni sredstava (sanacija, rekonstrukcija, druga namjena),
- za dodjelu novčanih sredstava iz tekućeg granta, vjerske zajednice su dužne dostaviti projekat sa kojim apliciraju za novčanu podršku, odnosno navesti naziv projekta, cilj, aktivnosti, planirano vrijeme realizacije, očekivani broj učesnika, mjesto realizacije, budžet planiranih aktivnosti sa jasno definisanim budžetskim stavkama i pojedinačnim iznosima;

b) Potrebne dozvole i saglasnosti: urbanističke, građevinske, saglasnosti Komisije za očuvanje nacionalnih spomenika i sl., ukoliko se radi o radovima koji podrazumijevaju ovakvu vrstu dokumentacije (prihvatljiva je dokumentacija starija od šest mjeseci, pod uslovom da nije istekla njena važnost u trenutku podnošenja prijave)

c) Aktuelni izvod iz registra nadležnog organa u kojem je registrovan podnosilac prijave;

d) Bankovna instrukcija za plaćanje (potvrda o broju tekućeg računa);

e) Dokaz o obezbjeđenju dodatnih sredstava od strane drugih donatora, za zahtjeve čija vrijednost prelazi iznos ukupno planiranih sredstava.

f) Izjava o primljenim de minimis potporama

Dokumentacija se podnosi u originalu ili ovjerenoj kopiji ne starijoj od 6 mjeseci.

V NAČIN ODABIRA KORISNIKA I OBAVJEŠTAVANJE

Prijava na Javni poziv obavezno se podnosi putem protokola Općine Centar, u pisanoj formi na propisanom obrascu, a koji je sastavni dio Javnog poziva.

Jedan podnosilac prijave može podnijeti više prijava u toku Javnog poziva, pri čemu nadležni organ zadržava diskreciono pravo da odobri finansiranje/sufinansiranje za samo jedan projekat po aplikantu.

Pristigle prijave iz stava razmatra nadležna općinska služba po redoslijedu podnošenja.

Služba će u roku od 30 (trideset) dana od dana prijema zahtjeva utvrditi da li su ispunjeni uslovi za dodjelu sredstava, te obavijestiti podnosioca zahtjeva.

Služba će uz prethodno pribavljeno mišljenje Komisije za odnose sa vjerskim zajednicama Općinskom načelniku dostaviti na razmatranje prijedlog odluke za finansiranje.

Konačnu odluku o dodjeli i visini sredstava za podršku vjerskim zajednicama donosi Općinski načelnik.

Općinski načelnik će na osnovu odluke, sa vjerskim zajednicama zaključiti Ugovor o finansiranju/sufinansiranju projektnih i drugih aktivnosti.

Svaki podnosilac zahtjeva može podnijeti prigovor Komisiji za razmatranje prigovora u roku od osam dana od dana prijema obavijesti/odluke. Odluku o prigovoru Komisija će donijeti u istom roku računajući od dana njegovog podnošenja

Dostavljeni lični podaci podnosioca prijava koristit će se isključivo za potrebe provođenja Javnog poziva, u skladu sa Zakonom o zaštiti ličnih podataka Bosne i Hercegovine.

VI PRAĆENJE I IZVJEŠTAVANJE

Korisnici sredstava su dužni u roku od 30 dana od okončanja aktivnosti, odnosno utroška sredstava dostaviti narativni i finansijski izvještaj o utrošku dodijeljenih sredstava, sa pratećom finansijskom dokumentacijom, kojom jasno dokazuju da je program/projekat realizovan.

Prihvatljivi su troškovi nastali u periodu od 01.01. do 31.12. tekuće godine.

VI NAČIN PODNOŠENJA ZAHTEVA

Zahtjev sa dokumentacijom se podnosi Službi za obrazovanje, društvene djelatnosti, kulturu i sport – Odsjek za kulturu i sport putem protokola Općine ili putem pošte sa naznakom „Javni poziv za izbor korisnika i dodjele sredstava vjerskim zajednicama iz Budžeta Općine Centar Sarajevo za 2026. godinu“. Javni poziv ostaje otvoren do 30. septembra tekuće budžetske godine, odnosno do utroška sredstava za ovu namjenu.

Sve dodatne informacije o načinu i postupku prijave na Javni poziv mogu se dobiti putem maila: kultura@centar.ba ili na broj telefona: 033/562-360 i 033/562-395.



OPĆINSKI NAČELNIK